

Vlada Kantona Sarajevo

Na osnovu čl. 26. i 28. stav (1) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka), te čl. 17. i 170. stav 1. alineja 24. Zakona o socijalnoj zaštiti, zaštiti civilnih žrtava rata i zaštiti porodice sa djecom ("Službene novine Kantona Sarajevo", broj 38/14 - Prečišćeni tekst, 38/16, 44/17 i 28/18), Vlada Kantona Sarajevo, na 60. sjednici održanoj 28.02.2020. godine, donijela je

UREDBU**O SUFINANSIRANJU TROŠKOVA PODSTANARSTVA**

Član 1.

(Osnovna odredba)

Ovom Uredbom se uređuje ko se smatra licem u stanju socijalne potrebe, kojim licima se obezbjeđuje sufinansiranje podstanarstva, način i kriteriji u skladu sa kojima se ostvaruje pravo na sufinansiranje troškova podstanarstva, sredstva za sufinansiranje, te druga pitanja bitna za provedbu ove uredbe.

Član 2.

(Lica u stanju socijalne potrebe)

- (1) Ministarstvo za rad, socijalnu politiku, raseljena lica i izbjeglice Kantona Sarajevo (u daljem tekstu: Ministarstvo) obezbijedit će sufinansiranje troškova podstanarstva za lica na području Kantona Sarajevo koja se nalaze u stanju socijalne potrebe.
- (2) Lica u stanju socijalne potrebe u smislu stava (1) ovog člana su:
 - a) korisnici stalne novčane pomoći,
 - b) korisnici dodatka za njegu i pomoć druge osobe I i II grupe po Zakonu o osnovama socijalne zaštite, zaštite civilnih žrtava rata i zaštite porodice sa djecom ("Službene novine Federacije BiH", br. 36/99, 54/04, 39/06, 14/09 i 45/16) (u daljem tekstu: Federalni zakon),
 - c) korisnici novčane naknade za pomoć i njegu od strane drugog lica - stara i nemoćna lica po Zakonu o socijalnoj zaštiti, zaštiti civilnih žrtava rata i zaštiti porodice sa djecom ("Službene novine Kantona Sarajevo", broj 38/14 - Prečišćeni tekst, 38/16, 44/17 i 28/18) (u daljem tekstu: Kantonalni zakon),
 - d) lica koja imaju binauralni gubitak sluha od 95-100% po FOWER-Sabine,
 - e) samohrani roditelji,
 - f) žrtve nasilja,
 - g) punoljetna lica kojima je prestala institucionalna briga, a koja su putem Javne ustanove "Kantonalni centar za socijalni rad" (u daljem tekstu: Kantonalni centar) bila smještena u hraniteljsku porodicu, ustanovu, instituciju ili drugu organizaciju sa kojom Kantonalni centar ima zaključen ugovor, memorandum ili protokol o saradnji.
- (3) Obezbeđenje privremenog smještaja za lica iz stava (2) ovog člana vršit će se isplatom odgovarajućeg novčanog iznosa na ime sufinansiranja troškova podstanarstva po osnovu iznajmljivanja stambenog prostora kojeg pronalazi korisnik.

Član 3.

(Kriteriji za obezbeđenje sufinansiranja)

- (1) Kriteriji za sufinansiranje troškova podstanarstva za lica iz člana 2. ove Uredbe su:
 - a) da imaju prebivalište najmanje godinu dana u Kantonu Sarajevo,
 - b) da ukupan prihod, koji čine prihodi iz člana 9. Kantonalnog zakona, po članu domaćinstva ne prelazi cenzus propisan članom 18. istog zakona,
 - c) izuzetno od tačke b) ovoga stava, licima koja su sticanjem punoljetstva ili napuštanjem institucionalne brige izgubila status djeteta bez roditeljskog staranja, kriterij za obezbeđenje sufinansiranja troškova podstanarstva je da ukupan prihod domaćinstva ne prelazi iznos prosječne neto plaće u Kantonu Sarajevo

ostvarene u prethodnoj kalendarskoj godini, uvećan za 10% za svakog narednog člana domaćinstva,

- d) da nemaju riješeno stambeno pitanje na području Bosne i Hercegovine, te da isto ne mogu riješiti na drugi način,
 - e) da nisu zaključila ugovor o doživotnom izdržavanju ili ugovor o poklonu nekretnina srođnicima,
 - f) da nisu prodala nekretninu,
 - g) da nemaju punoljetnu djecu koja su dužna da ih izdržavaju po odredbama Porodičnog zakona Federacije Bosne i Hercegovine ("Službene novine Federacije BiH", br. 35/05 i 41/05),
 - h) da lice ili neko od članova zajedničkog domaćinstva nije vlasnik preduzeća, samostalne radnje ili obavlja registrovanu dopunsku djelatnost,
 - i) da lice ili neko od članova zajedničkog domaćinstva ne izdaje pod zakup stambene jedinice,
 - j) da lice ili neko od članova zajedničkog domaćinstva nije vlasnik putničkog ili drugog motornog vozila, osim lica koja u skladu sa propisom koji uređuje carinsku politiku u Bosni i Hercegovini, mogu ostvariti pravo na oslobađanje carine pri uvozu putničkog ili drugog motornog vozila kao ortopedskog ili drugog pomagala.
- (2) Sufinansiranje troškova podstanarstva će se obezbeđivati licima iz člana 2. ove Uredbe ukoliko Kantonalni centar nakon uvida u cjelokupnu materijalnu, socijalnu i zdravstvenu situaciju da mišljenje o potrebi obezbeđenja privremenog smještaja, koje dostavlja Ministarstvu na saglasnost.
 - (3) Nakon dobijanja saglasnosti od Ministarstva, Kantonalni centar izdaje uvjerenje o sufinansiranju troškova podstanarstva (u daljem tekstu: uvjerenje) i sa korisnikom zaključuje ugovor o sufinansiranju podstanarstva.

Član 4.

(Obaveze plaćanja troškova podstanarstva)

- (1) Uvjerenjem se definiše da Ministarstvo ima obavezu sufinansiranja troškova podstanarstva u trajanju od jedne godine, na način utvrđen članom 3. ove Uredbe, a u skladu sa odobrenim sredstvima u Budžetu Kantona Sarajevo sa pozicije Ministarstva, dok korisnik ima obavezu plaćanja razlike između iznosa troškova sufinansiranja podstanarstva i pune cijene podstanarstva, te svih oblika režijskih i drugih troškova koji proizilaze iz podstanarstva.
- (2) Uvjerenjem će se definisati i da će Kantonalni centar svake godine, nakon što protekne rok od godinu dana od dana izdavanja uvjerenja, izvršiti provjeru ispunjenosti uslova za ostvarivanje ovog prava.
- (3) Ukoliko se nakon provjere ispunjenosti uslova utvrdi da su uslovi i dalje ispunjeni, izdaće se novo uvjerenje i sa korisnikom zaključiti Aneks ugovora, a ukoliko se utvrdi da uslovi više nisu ispunjeni, Kantonalni centar će u roku od 30 dana raskinuti ugovor sa korisnikom i o istom obavijestiti Ministarstvo.

Član 5.

(Utvrđeni neto iznosi)

Isplata sredstava korisnicima će se vršiti zavisno od broja članova porodičnog domaćinstva i pripadajuće kvadrature iznajmljenog stambenog prostora, u neto iznosu kako slijedi:

- a) garsonjera (do dva člana domaćinstva) - 200,00 KM,
- b) jednosoban-jednospoban stan (tri do četiri člana domaćinstva) - 250,00 KM,
- c) dvosoban i veći stan (pet i više članova domaćinstva) - 300,00 KM.

Član 6.

(Isplata sredstava)

Sredstva po obavezama iz člana 5. ove Uredbe terete poziciju Ministarstva, koje će isplatu sredstava vršiti mjesečno unaprijed, uplatom na tekući račun poslovne banke za koju se korisnik opredijeli, a prema dostavljenoj evidenciji korisnika od strane Kantonalnog centra koja sadrži ime i prezime korisnika, JMBG, broj lične/osobne karte i iznos sredstava koji se uplaćuju.

Član 7.

(Provjera ispunjavanja kriterija)

Kantonalni centar će u roku od 30 dana od dana početka primjene ove Uredbe, za sva lica koja su ostvarila pravo na sufinansiranje troškova podstanarstva na osnovu Zaključka Vlade Kantona Sarajevo broj: 02-05-8403-28/12 od 29.03.2012. godine, izvršiti provjeru ispunjavanja propisanih uslova iz ove uredbe, te postupiti u skladu sa članom 4. stav (3) ove Uredbe.

Član 8.

(Obaveza prijave promjena)

Korisnici prava na sufinansiranje troškova podstanarstva obavezni su Kantonalmom centru prijaviti svaku promjenu koja utiče na ostvarivanje ovog prava.

Član 9.

(Nadležnost za realizaciju uredbe)

Za realizaciju ove Uredbe obavezuju se Ministarstvo, Ministarstvo finansija Kantona Sarajevo i Kantonalni centar.

Član 10.

(Gramatička terminologija)

Gramatička terminologija korištenja muškog i ženskog roda za pojmove u ovoj Uredbi, uključuje oba roda.

Član 11.

(Stupanje na snagu)

Ova Uredba stupa na snagu narednog dana od dana objavljivanja u "Službenim novinama Kantona Sarajevo", a primjenjivat će se od 01.05.2020. godine.

Broj 02-04-5509-25/20
28. februara 2020. godine
Sarajevo

Premijer
Edin Forto, s. r.

Na osnovu čl. 26. i 28. stav (1) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14-Ispravka) i člana 164. Zakona o socijalnoj zaštiti, zaštiti civilnih žrtava rata i zaštiti porodice sa djecom ("Službene novine Kantona Sarajevo", broj 38/14 - Prečišćeni tekst, 38/16, 44/17 i 28/18), Vlada Kantona Sarajevo na 60. sjednici održanoj 28.02.2020. godine, donijela je

**UREDBU
O SUBVENCIONIRANJU BORAVKA DJECE U
PREDŠKOLSKIM USTANOVAMA NA PODRUČJU
KANTONA SARAJEVO**

Član 1.

(Predmet)

Ovom Uredbom utvrđuje se način i cilj subvencioniranja boravka djece u predškolskim ustanovama, korisnici prava subvencioniranja boravka, uslovi za ostvarivanje prava i procentualni iznosi subvencije, razlozi nemogućnosti ostvarivanja prava, postupak ostvarivanja prava, sredstva za finansiranje realizacije ove uredbe, nadležni organi i njihove obaveze, kao i druga pitanja od značaja za subvencioniranje boravka djece u predškolskim ustanovama na području Kantona Sarajevo.

Član 2.

(Definicije)

- (1) Predškolske ustanove u smislu ove Uredbe su ustanove registrirane kod nadležnog suda za djelatnost predškolskog obrazovanja i odgoja na području Kantona Sarajevo.
- (2) Boravak djece u predškolskim ustanovama u smislu ove Uredbe je korištenje usluga obrazovanja i odgoja pruženih djeci od strane predškolskih ustanova.
- (3) Subvencioniranje boravka je potpuno ili djelimično oslobađanje od plaćanja cijene boravka djece u predškolskim ustanovama.
- (4) Cijena boravka djece u predškolskim ustanovama u smislu ove Uredbe je cijena utvrđena odlukom Vlade Kantona Sarajevo za boravak djece u JU "Djeca Sarajeva" za jedan mjesec.
- (5) Za pojmove koji se koriste u ovoj Uredbi a koji nisu posebno definisani ovom Uredbom primjenjivat će se definicije iz Zakona o osnovama socijalne zaštiti, zaštite civilnih žrtava

rata i zaštite porodice sa djecom ("Službene novine Federacije BiH", br. 36/99, 54/04, 39/06, 14/09, 45/16 i 40/18) i Zakona o socijalnoj zaštiti, zaštiti civilnih žrtava rata i zaštiti porodice sa djecom ("Službene novine Kantona Sarajevo", broj 38/14 - Prečišćeni tekst, 38/16, 44/17 i 28/18).

Član 3.

(Cilj)

Boravak djece u predškolskim ustanovama subvencionira se u cilju obezbjeđenja jednakih uvjeta za obrazovanje, odgoj, njegu i zbrinjavanje djece predškolskog uzrasta i u skladu sa potrebama očuvanja socijalne sigurnosti porodice sa niskim primanjima.

Član 4.

(Subvencioniranje boravka u jednoj ili dvije predškolske ustanove)

- (1) U skladu sa odredbama ove Uredbe djeca imaju pravo na subvencioniranje boravka u jednoj predškolskoj ustanovi.

- (2) Izuzetno od prethodnog stava, djeca s teškoćama u razvoju mogu ostvariti pravo na subvencioniranje boravka u dvije predškolske ustanove, u skladu sa članom 10. ove Uredbe, s tim da jedna predškolska ustanova ima registriran program kojim se mogu zadovoljiti odgojno obrazovne i razvojne potrebe djece sa invaliditetom i omogućiti produženi stručni tretman u okviru kompenzacionih i rehabilitacionih razvojnih programa.

Član 5.

(Subvencioniranje boravka u iznosu od 100% cijene boravka djece u predškolskim ustanovama)

Pravo na subvencioniranje boravka u iznosu od 100% cijene boravka djece u predškolskim ustanovama ostvaruju:

- a) djeca bez oba roditelja,
- b) djeca čiji je jedan od roditelja osoba sa invaliditetom iz Zakona o osnovama socijalne zaštiti, zaštite civilnih žrtava rata i zaštite porodice sa djecom,
- c) djeca korisnika naknade za pomoć i njegu od strane druge osobe,
- d) djeca korisnika prava na stalnu novčanu pomoć,
- e) djeca sa invaliditetom,
- f) djeca u čijem domaćinstvu ima jedno ili više lica sa intelektualnim poteškoćama ili psihički oboljelih osoba,
- g) djeca čija su oba roditelja redovni studenti,
- h) djeca koja se sudskom odlukom povjeravaju na čuvanje i odgoj drugoj osobi,
- i) djeca čiji je jedan roditelj zaposlen ukoliko je drugi roditelj umro ili nije priznao očinstvo.

Član 6.

(Subvencioniranje boravka u iznosu od 50% cijene boravka djece u predškolskim ustanovama)

- (1) Pravo na subvencioniranje boravka u iznosu od 50% od cijene troškova boravka djece u predškolskim ustanovama, pod uslovom iz stava (2) ovog člana, ostvaruju:
 - a) djeca zaposlenih roditelja,
 - b) djeca čiji je jedan od roditelja zaposlen, a drugi redovan student.
- (2) Uslov za ostvarivanje prava iz stava (1) ovog člana je da prihod po članu domaćinstva ne prelazi 35% prosječne plaće definisane u Zakonu o socijalnoj zaštiti, zaštiti civilnih žrtava rata i zaštiti porodice sa djecom pod uvjetom da ispunjavaju ostale kriterije za ostvarivanje prava na dodatak na djecu.

Član 7.

(Subvencioniranje boravka u iznosu od 30% od cijene boravka djece u predškolskim ustanovama)

Pravo na subvencioniranje boravka u iznosu od 30% od cijene boravka u predškolskim ustanovama ostvaruju djeca čiji su roditelji zaposleni, bez obzira na ukupne prihode domaćinstva, ako dvoje ili više djece iz te porodice boravi u predškolskoj ustanovi.

Član 8.

(Razlozi nemogućnosti ostvarivanja prava na subvencioniranje boravka)

Pravo na subvencioniranje boravka ne može ostvariti dijete u čijem domaćinstvu je jedan od članova zajedničkog domaćinstva osnivač ili suosnivač poslovnog subjekta registriranog u skladu sa